

आकाशवाणी जयपुर-अजमेर

दिनांक 04.09.2025

समय: 18.45 बजे

प्रादेशिक समाचार

- घणी बिरखा रे कारण न्यारा-न्यारा जिलां मांय साखां ने व्ह्या नुकसाण रा मुद्दा माथे विधानसभा मांय आज विपख रो हंगामो-सरकार कह्यो-पीड़ित लोगां ने हरसंभव मदद देवण सारु ज़रूरी जतन कर्या जा रह्या है।
- मुख्यमंत्री भजनलाल शर्मा जीएसटी परिषद् रा फैसलां सारु केन्द्र सरकार रो आभार जतायो।
- काल शिक्षक दिवस मणायो जावेला-राज्य स्तर रो जळसो जयपुर मांय व्हेला।

अर

- राज्य रा घणखर हलकां मांय लगातार बिरखा ऊं जिंदगी माथे असर पड़्यो-आवता तीन-चार दिन लंकाऊ-ऊगणी हलकां मांय भारी बारिश रा आसार।

000

राज्य मांय व्हे रही घणी बिरखा रे कारण न्यारा-न्यारा जिलां मांय साखां मांय व्ह्या खराबा रा मामला मांय आज विधानसभा मांय जोरदार हंगामो व्ह्यो। शून्यकाल रे दौरान कांग्रेस स्थगन प्रस्ताव रे मार्फत अणूती बिरखा ऊं किसानां रा नुकसाण अर मुआवज़ा रो मुद्दो जोर-शोर ऊं उठायो। विपख रा सदस्य पीड़ित काश्तकारां ने पर्याप्त मुआवज़ो देवण रो ऐलाण तुरत ई करण री मांग कीनी। कृषि मंत्री डॉ. किरोड़ी लाल मीणा सदन ने बतायो के पीड़ित किसानां ने मुआवज़ो देवण री व्यवस्था करी ज्यी है अर ई सारु प्रशासनिक लेवल माथे ज़रूरी जतन कर्या जा रह्या है।

विपख रा नेता टीकाराम जूली कृषि मंत्री रा बयान ने अपर्याप्त बताता थकां मुआवज़ा री रकम बधावण री मांग कीनी। वे कह्यो के भारी तबाही रे कारण सरकार कानी ऊं करी ज्यो राहत रो ऐलाण किसानां सारु काफ़ी नी है।

संसदीय कार्यमंत्री जोगाराम पटेल खबरनवीसां सागे बातचीत करता थकां विपख रा आरोपां ने गलत बतायो। वे कह्यो के राज्य सरकार घणी बिरखा रा असर वाळा हलकां मांय जनता ने साता देवण सारु लगातार काम कर रही है। मंत्री बतायो के ई सारु जिलां रा प्रभारी मंत्री काल ताई आप-आप रा जिलां रो दौरा कर र नुकसाण रो जायज़ो लेवेला।

विधानसभा आज विपक्ष रा सदस्यां रा शोरगुल बीचे आधा घंटा मांय तीन बिल पास कर दीना। ई पाछे सदन री कार्यवाही 8 सितम्बर ताई टाळ दीरीजी। राज्य मांय व्हे रही ज़ोरदार बिरखा रा मामला ने लेर विपक्ष रा सदस्य शून्यकाल ऊं ई हंगामो करण लाग्या। नाराबाज़ी बीचे ई मंत्री सुमित गोदारा कारखाना संशोधन बिल 2025 सदन मांय पेश कीनो। वे कह्यो के मजूरां रा संगठनां सागे बातचीत रे दौरान मिल्या सुझावां रे मुजब मजूरां ने फायदो अर रियायत दी जा रही है। सदन ई सागे ई राजस्थान विनियोग बिल 2025 अर राजस्थान माल अर सेवा कर (द्वितीय संशोधन) बिल 2025 ध्वनि मत ऊं पास कर दीना।

000

मुख्यमंत्री भजनलाल शर्मा जीएसटी ऊं जुड़्या ऐतिहासिक फैसला सारु केन्द्र सरकार रो आभार जतायो है। आज विधानसभा परिसर मांय खबरनवीसां सागे बातचीत करता थकां वे कह्यो के ई फैसला ऊं जनता, किसानां अर गरीब तबका री जनता ने सब ऊं बत्तो फायदो मिलेला अर माली व्यवस्था ई तेज़ व्हेला।

भारतीय जनता पार्टी रा प्रदेश अध्यक्ष मदन राठौड़ ई फैसला री हिमायत कीनी है। आज जयपुर मांय खबरनवीसां सागे बातचीत करता थकां वे कह्यो के इण ऊं समाज रा सगळा तबकां ने आराम मिलेला अर लोगां री ज़िंदगी आसान व्हेला।

जीएसटी सुधारां ऊं कारोबार जगत मांय ई खुशी रो माहौल है। फेडरेशन ऑफ ट्रेड एण्ड इंडस्ट्री-फोर्टी रा अध्यक्ष सुरेश अग्रवाल केन्द्र सरकार अर जीएसटी परिषद् री ओर ऊं करी ज्या फैसला रो स्वागत कीनो है।

ध्यानजोग है के जीएसटी परिषद जनता रा काम री न्यारा-न्यारा सामान माथे लागण वाळा वस्तु अर सेवा कर-जीएसटी री रेट 18 अर 12 फीसदी ऊं घटा र 5 फीसदी करण रो फैसलो कीनो है। अप्रत्यक्ष कर ढांचा मांय सुधार करता थकां परिषद मौजूदा चार स्लैब ने घटा र दो स्लैब कर दीनी है। 12 फीसदी अर 28 फीसदी री रेट खत्म कर दीरीजी है, जदके 5 अर 18 फीसदी री स्लैब बरकरार राख्यी ज्यी है। जीएसटी री नुवी रेट ई महीना री 22 तारीख ऊं लागू व्हेला।

000

काल राष्ट्रीय शिक्षक दिवस जळसा सागे मणायो जावेला। ई मौके बेहतरीन काम करण वाळा 45 अध्यापकां रो राष्ट्रपति द्रौपदी मुर्मू मान करेला। ओ दिन पैली वाळा राष्ट्रपति सर्वपल्ली राधाकृष्णन रा जन्मदिन रे मौके मणायो जावे है। जयपुर रा बिरला सभागार मांय राख्या जावण वाळा राज्य स्तर रा शिक्षक सम्मान समारोह मांय मुख्यमंत्री भजनलाल शर्मा, उपमुख्यमंत्री, तकनीकी अर उच्च शिक्षा मंत्री डॉ. प्रेमचन्द बैरवा अर शिक्षा मंत्री मदन दिलावर ई शामिल व्हेला। इण ऊं पैली आज सिंज्यां बिड़ला सभागार मांय सांस्कृतिक कार्यक्रम राख्यो जा रह्यो है। शिक्षक दिवस रे मौके मुख्यमंत्री भजनलाल शर्मा शिक्षकां ने बधाई अर शुभकामनावां दीनी है। वे कह्यो के शिक्षक विद्यार्थियां री ज़िंदगी मांय ज्ञान भर र समाज अर देश रा उजळा भविष्य री नींव रखे है।

000

केंद्रीय जनजातीय कार्य मंत्री जुएल ओरांव आज कोटा मांय लोकसभा अध्यक्ष ओम बिरला सागे न्यारा-न्यारा कार्यक्रमां मांय शामिल व्ह्या। वे जय मीनेश आदिवासी विश्वविद्यालय

मांय आदिवासी नेता भैरवलाल कालाबादल री जयंती रे मौके राखी ज्या कार्यक्रम मांय भाग लीनो। ई दौरान वे विश्वविद्यालय भवन ई जनता ने सूप्यो अर भामाशाहां रो मान कीनो। केन्द्रीय स्वास्थ्य अर परिवार कल्याण मंत्री जे.पी. नड्डा रो ई प्रदेश रा दौरा सारु जोधपुर आवण रो कार्यक्रम है।

000

राज्य रा घणखर हलकां मांय लारला दो-तीन दिन ऊं व्हे रही जोरदार बिरखा रे कारण जिंदगी माथे असर पड़ रह्यो है। बरसात रे कारण केई ठोड़ा नीचला हलकां मांय पानी भर ग्यो है, जद के नदी-नाळां मांय उफण रह्या पाणी ऊं केई गेला बंद व्हे गया है। डीग रा सरकारी अस्पताल मांय पाणी भर जावण ऊं मरीजां अर इलाज करण वाळां ने परेशानी रो सामो करणो पड़ रह्यो है। अलवर मांय रूपारेल नदी माथे स्पट चालण ऊं विद्यार्थियां ने परेशानी व्ही। आज सिलीसेढ़ झील अर मूसी महारानी छतरी कने रा सागर तळाव ऊं ई पाणी निकळबा लाग ग्यो। हनुमानगढ़ जिला मांय ई घग्घर नदी मांय पाणी रा लगातार बध रह्या लेवल ने ध्यान राखता थकां प्रशासन सावचेत व्हे ग्यो है। अजमेर मांय काल रात ऊं सरु व्ह्यो बिरखा रो दौर आज ई चालतो रह्यो। जिला कलेक्टर न्यारा-न्यारा हलकां रो दौरा कर र हालात रो जायजो लीनो। भीलवाड़ा रा जिला कलेक्टर ई जनता ऊं बिरखा रे दौरान घर मांय ई रहवण री अपील कीनी है। बांसवाड़ा मांय ई कदे तेज तो कदे हल्की बरसात रो सिलसिलो चाल रह्यो है। जिला रा सज्जनगढ़ मांय जकोड़िया नदी रा तेज बहाव मांय एक कार बह गयी, जिण ने गांव वाळां री मदद ऊं बाहर निकाळी ज्यी। म्हाणा खबरनवीस बतायो के माही बंधा मांय लगातार आ रह्या पाणी ने ध्यान राखता थकां ई रा 16 दरुजा खोल र बत्तो पाणी निकाळ्यो जा रह्यो है।

मौसम विभाग आवता तीन-चार दिन राज्य रा लंकाऊ-ऊगणी हलकां मांय भारी बारिश रा आसार जताया है। ई दौरान कोटा अर उदयपुर संभाग मांय कठे-कठे घणी भारी बिरखा व्हे सके है। मौसम विभाग आज राजधानी जयपुर समेत 18 जिलां मांय बरसात रो ऑरेंज अलर्ट जारी कीनो है। ई सागे ई 15 जिलां मांय बारिश रो येलो अलर्ट जारी करी ज्यो है। महकमा रे मुजब काल ऊं जोधपुर अर बीकानेर संभाग रा कुछ हलकां मांय बिरखा रा जोर बधबा रा आसार है।

000